



**Saopštenje za javnost Ministarstva za rad, socijalnu politiku, raseljena lica i izbjeglice KS:**

Nema finansijskih mogućnosti za donošenje novog socijalnog programa

Povodom kontinuiranih izjava ministra prostornog uređenja i zaštite okoliša KS Zlatka Petrovića da će se pitanje povećanja cijena centralnog grijanja rješavati putem socijalnog programa, koji treba da donese Ministarstvo za rad, socijalnu politiku, raseljena lica i izbjeglica Kantona Sarajevo, dajemo sljedeće saopštenje:

Ministarstvo za rad, socijalnu politiku, raseljena lica i izbjeglica Kantona Sarajevo ne može izraditi socijalni program koji bi mogao pratiti poskupljenje grijanja, jer u Budžetu ovog ministarstva za ovu godinu nema finansijskih sredstva za uvođenje novih socijalnih kategorija.

Ministarstvo trenutno subvencionira 52.933 građana Kantona Sarajevo koji ostvaruju jedno ili više od 28 prava iz domena socijalne zaštite, zaštite civilnih žrtava rata i zaštite porodice sa djecom.

Donošenjem novog socijalnog programa dovelo bi do onemogućavanja izvršavanja zakonom propisanih i priznatih prava, a time u pitanje i egzistenciju najvećeg broja sadašnjih korisnika prava iz okvira socijalne zaštite, zaštite civilnih žrtava rata i zaštite porodice sa djecom.

Izrada socijalnog programa koji zagovara ministar Petrović podrazumijeva uvođenje u pravo na subvencioniranje grijanja novih lica. Omogućavanjem subvencioniranja grijanja novim licima uskratila bi se naknade najugroženijim kategorijama stanovnika Kantona Sarajevo. Jednostavno rečeno, počevši od oktobra pa do kraja ove godine ne bi se mogle isplaćivati naknade za porodicu, dječiji dodatak, tuđa njega i pomoć, javne kuhinje, itd.

Ističemo da je u fokusu djelovanja ovog ministarstva prevashodno briga za najugroženije kategorije stanovništva a ne briga za ekonomsko poslovanje resora prostornog uređenja.

Iz ovih razloga, pozivamo ministra Petrovića da se ubuduće u svojim izjavama isključivo ograniči na resor za koji je nadležan, jer očito dovoljno ne poznaje finansijske mogućnosti socijalnog sektora u Kantonu Sarajevo.



**MINISTAR**  
**Muamer Bandić, dipl. iur. s.r.**

